

BOSNA I HERCEGOVINA

Brčko distrikt BiH

SKUPŠTINA

BRČKO DISTRIKTA BiH



БОСНА И ХЕРЦЕГОВИНА

Брчко дистрикт БиХ

СКУПШТИНА

БРЧКО ДИСТРИКТА БиХ

Mladena Maglova 2, 76100 Brčko distrikt BiH, telefon i faks: 049/215-516

Младена Маглова 2, 76100 Брчко дистрикт БиХ, тел. и факс: 049/215-516

Na osnovu člana 22 Statuta Brčko distrikta Bosne i Hercegovine – prečišćeni tekst (Službeni glasnik Brčko distrikta Bosne i Hercegovine, broj 2/10), Skupština Brčko distrikta Bosne i Hercegovine na I. nastavku 56. redovne sjednice održanom 4. decembra 2019. godine, usvaja

**ZAKON
O IZMJENAMA I DOPUNAMA
ZAKONA O SOCIJALNOJ ZAŠTITI BRČKO DISTRIKTA**

Član 1

U Zakonu o socijalnoj zaštiti Brčko distrikta (Službeni glasnik Brčko distrikta BiH, brojevi: 01/03, 04/04, 19/07, 02/08 i 21/18):

U članu 7 stav 1 mijenja se i glasi:

„(1) Prava iz socijalne zaštite su lična i ne mogu se prenositi, a utvrđuju se od prvog dana narednog mjeseca od dana podnošenja zahtjeva, odnosno pokretanja postupka po službenoj dužnosti.“

U članu 7 dodaje se stav 2 koji glasi:

„(2) Korisnik prava po ovom zakonu dužan je da prijavi svaku promjenu koja je od uticaja na ostvarivanje i obim tog prava, u roku od 30 (trideset) dana od dana nastale promjene.“

Član 2

Član 13 mijenja se i glasi:

„Maloljetnikom ometenim u fizičkom ili psihičkom razvoju smatra se lice sa: oštećenjem čula vida i sluha, poremećajem u govoru i glasu, tjelesnim oštećenjem, psihičkom zaostalošću ili s kombinovanim smetnjama, autizmom, psihičkim deficitom i kombinovanim smetnjama (u daljnjem tekstu: dijete s posebnim potrebama).“

Član 3

Član 25 mijenja se i glasi:

„Prosječna plata u smislu ovog zakona definiše se kao prosječna mjesečna neto plata utvrđena mjesečnim statističkim izvještajem Agencije za statistiku, Područna jedinica Brčko.“

Član 4

U članu 28 stavu 1 tački 2 brišu se riječi: „i druga“.

U članu 28 tački 3 riječi: „maloljetnih lica“ mijenjaju se u riječ: „djece“.

U članu 28 dodaje se stav 2 koji glasi:

„(2) Prava po ovom zakonu ostvaruju lica koja imaju prebivalište na području Brčko distrikta Bosne i Hercegovine najmanje dvije godine neprekidno do dana podnošenja zahtjeva.“

U članu 28 dodaje se stav 3 koji glasi:

„(3) Stalno mjesto prebivališta dokazuje se uvjerenjem koje izdaje nadležni organ.“

Član 5

Poglavlje IV odjeljak 2 mijenja se i glasi:
„NOVČANA MATERIJALNA POMOĆ”.

Član 6

U članu 30 stavu 1 brišu se riječi: „redovna“ i „i druga“.
U članu 30 stav 2 mijenja se i glasi:
„(2) Novčana materijalna pomoć može biti stalna ili jednokratna.”

Član 7

Član 31 stav 1 mijenja se i glasi:
„(1) Pravo na stalnu osnovnu novčanu pomoć ima materijalno neosigurano lice pod sljedećim uslovima:
a) da ima prebivalište na području Distrikta najmanje dvije godine neprekidno do dana podnošenja zahtjeva,
b) da je nesposobno za rad,
c) da nema nikakvih prihoda,
d) da nema srodnika koji su po zakonu obavezni da ga izdržavaju ili ako ih ima da nisu u mogućnosti da izvršavaju obavezu izdržavanja,
e) da nema zemljište ukupne površine veće od dva dunuma,
f) da nema više od jednog stambenog prostora.”

U članu 31 dodaje se stav 2 koji glasi:

„(2) Od odredbe iz tačke d) prethodnog stava ovog člana bit će izuzeta punoljetna lica koja su kao maloljetne osobe kategorisani kao djeca s posebnim potrebama.”

Član 8

Član 32 mijenja se i glasi:

„(1) Pravo na jednokratnu novčanu pomoć (u daljnjem tekstu: jednokratna pomoć) ima lice kojem je usljed posebnih okolnosti potreban odgovarajući oblik socijalne zaštite.

(2) Posebni uslovi za ostvarivanje jednokratne novčane pomoći su:

- a) da ima prebivalište na teritoriji Brčko distrikta BiH najmanje dvije godine neprekidno do dana podnošenja zahtjeva;
- b) da nema srodnika koji su po zakonu obavezni da ga izdržavaju ili, ako ih ima, da nisu u mogućnosti izvršavati obavezu izdržavanja;
- c) da ima mjesečne prihode manje od 45% od prosječne mjesečne plate;
- d) da nema zemljište ukupne površine veće od dva dunuma,
- e) da nema više od jednog stambenog prostora,
- f) ako stanje socijalne potrebe ne može biti zadovoljeno po osnovu drugog zakona ili propisa.

(3) Jednokratna pomoć ne smije preći iznos stalne osnovne novčane pomoći isplaćene u tekućem mjesecu u skladu s ovim zakonom i može biti dodijeljena korisniku najviše 3 (tri) puta godišnje.

(4) Suprotno od prethodnog stava ovog člana, naknada zbog smrti korisnika stalne osnovne novčane pomoći i porodičnog dodatka i lica smještenog u ustanovu socijalne zaštite kojem nadležni organ koji ga smješta plaća cjelokupni iznos smještaja, bit će isplaćena samo jednom u trostrukom iznosu stalne osnovne novčane pomoći za mjesec u kojem se isplaćuje licu koje je preuzelo plaćanje troškova sahrane.”

Član 9

U članu 33 stavu 1 tački c) dodaje se riječ: „života“ iza riječi: „godine“ i glasi:

„c) Samohrani roditelj koji se stara o jednom ili više djece do jedne godine života djeteta;“.
U članu 33 stavu 1 tačka f) mijenja se i glasi:
„f) Lice s oduzetom poslovnom sposobnošću.”

Član 10

U članu 34 stav 1 mijenja se i glasi:

„(1) Oboljenja kao što su paraliza, distrofija, srodna mišićna i neuromišićna oboljenja, multipla skleroza, ometenost u psihičkom razvoju, sljepoća, dijabetes s naglašenim komplikacijama, karcinomom, teški oblici reumatoidnog artritisa i degenerativna koštana mišićna oboljenja, teška (poodmakli stadij) kardio-respiratorna oboljenja su oboljenja koja se imaju smatrati osnovom za utvrđivanje nesposobnosti za rad lica u postupku utvrđivanja prava na stalnu osnovnu novčanu pomoć i porodični dodatak.“

U članu 34 dodaje se stav 2 koji glasi:

„(2) Nesposobnost za rad utvrđuje stručna ljekarska komisija koju imenuje šef Odjeljenja.“

U članu 34 dodaje se stav 3 koji glasi:

„(3) Za lica iz člana 33 ovog zakona stručna ljekarska komisija ne utvrđuje nesposobnost za rad.“

U članu 34 dodaje se stav 4 koji glasi:

„(4) Lice iz člana 33 tački c) i d) ovog zakona ne može biti korisnikom prava na stalnu osnovnu novčanu pomoć ukoliko ostvaruje pravo na materinski dodatak.”

Član 11

Član 35 mijenja se i glasi:

„(1) Drugostepenu stručnu ljekarsku komisiju imenuje gradonačelnik.“

U članu 35 dodaje se stav 2 koji glasi:

„(2) Zadatak komisije iz stava 1 ovog člana je odlučivanje po uloženom prigovoru na nalaz i mišljenje stručne ljekarske komisije.”

Član 12

U članu 37 stav 1 mijenja se i glasi:

„(1) Stalna osnovna novčana pomoć pripada samo jednom članu domaćinstva kao korisniku pomoći, a dodatak iz tačke 2 prethodnog člana članovima domaćinstva korisnika kao sauživaocima.“

U članu 37 stav 3 mijenja se i glasi:

„(3) Korisniku prava na stalnu osnovnu novčanu pomoć i porodičnog dodatka, djeci s posebnim potrebama za koje je nadležni organ donio akt o razvrstavanju zbog ometenosti u razvoju, licima smještenim u ustanove socijalne zaštite duže od 30 dana, licima smještenim u hraniteljskoj porodici duže od 30 dana, pripada i pravo na zdravstvenu zaštitu ukoliko to pravo ne može ostvariti po drugom osnovu.“

Član 13

U članu 38 stav 2 tačka 1 mijenja se i glasi:

„1. Bračni ili vanbračni drug i dijete (bračno, vanbračno, usvojeno, pastorče i dijete bez roditeljskog staranja uzeto na izdržavanje);“.

Član 14

U članu 41 stavu 1, broj: „33“ mijenja se brojem: „31“.

Član 15

U članu 43 stavu 4 tačka a) mijenja se i glasi:

„a) za djecu od 3 do 18 godina na osnovu nalaza i mišljenja Komisije za kategorizaciju psihofizički ometene djece i omladine u razvoju, koju imenuje šef Odjeljenja;“.

Član 16

Član 44 mijenja se i glasi:

„Pravo na jednokratnu pomoć ima i materijalno neosigurano lice koje je sposobno za rad, a nađe se u stanju socijalne potrebe usljed teškoća izazvanih posebnim okolnostima iz člana 21 ovog zakona, ukoliko ispunjava ostale uslove iz člana 32 ovog zakona.“

Član 17

Član 50 mijenja se i glasi:

„Smještaj u ustanovu socijalne zaštite ili drugu porodicu ima za cilj da licu u stanju socijalne potrebe osigura socijalnu zaštitu koja može da obuhvati stanovanje, ishranu, odijevanje, zdravstvenu i drugu njegu, odgoj i osposobljavanje za rad.“

Član 18

Član 71 mijenja se i glasi:

„Bliže uslove u pogledu prostora, opreme i potrebnih stručnih i drugih radnika ustanova socijalne zaštite utvrđuje Vlada Brčko distrikta Bosne i Hercegovine na prijedlog šefa Odjeljenja.“

Član 19

U članu 84, broj: „84“ zamjenjuje se brojem: „83“.

Član 20

U članu 85, broj: „84“ zamjenjuje se brojem: „83“.

Član 21

U članu 87 broj: „84“ zamjenjuje se brojem: „83“.

Član 22

U članu 90 stavu 1 tačka a) mijenja se i glasi:

„a) pružati usluge u skladu s rješenjem Odjeljenja,“.

U članu 90 stavu 1 tački b), broj: „84“ zamjenjuje se brojem: „83“.

Član 23

Član 108a mijenja se i dopunjava stavovima 2 i 3 i glasi:

„Član 108a

(1) Odjeljenje za zdravstvo i ostale usluge, Pododjeljenje za socijalnu zaštitu (u daljnjem tekstu: Pododjeljenje za socijalnu zaštitu) dužno je do 31. 12. 2019. godine, u skladu s članovima 43 i 43a ovog zakona, izvršiti reviziju predmeta korisnika prava na dodatak za njegu i pomoć od drugog lica i donijeti novo rješenje za period utvrđenog prava od 1. 12. 2018. godine.

(2) Novo rješenje iz stava 1 ovog člana donosi šef Odjeljenja za zdravstvo i ostale usluge.

(3) Doneseno rješenje iz stava 1 ovog člana sadrži odredbu o ukidanju prethodnog izvršnog rješenja korisnika.“

Član 24

Iza člana 108a dodaje se novi član 108b koji glasi:

„Član 108b

Korisnici trajnog prava na dodatak za njegu i pomoć od drugog lica koji se ne odazovu u svrhu izvršenja revizije po članu 108a ovog zakona, zadržavaju prava stečena ranijim rješenjem, a u skladu s članom 43 Zakona o socijalnoj zaštiti Brčko distrikta (Službeni glasnik Brčko distrikta BiH, brojevi: 01/03, 04/04, 19/7, 2/08 i 21/18).“

Član 25

Član 109a mijenja se i glasi:

„Član 109a

Pravna lica koja pružaju usluge smještaja za odrasla i stara lica, socijalno zdravstveno zbrinjavanje invalidnih lica i drugih lica i dnevni boravak korisnika socijalne zaštite, dužni su uskladiti svoju djelatnost, akte i rad s ovim zakonom i propisima donesenim na osnovu njega u roku od dvadeset četiri (24) mjeseca od dana stupanja na snagu Pravilnika o općim tehničkim i stručnim uslovima za osnivanje i rad ustanova socijalne zaštite za odrasla i stara lica i Pravilnika o općim, tehničkim i stručnim uslovima za osnivanje i rad ustanove za dnevni boravak korisnika socijalne zaštite.”

Član 26

Član 110 se briše, dok dosadašnji članovi: „član 111, član 112, član 113, član 114 i član 115“ postaju članovi: „član 110, član 111, član 112, član 113 i član 114“.

Član 27

Ovaj zakon stupa na snagu narednog dana od dana objavljivanja u Službenom glasniku Brčko distrikta BiH.

Broj: 01-02-728/19

Brčko, 4. 12. 2019. godine

**PREDSJEDNIK
SKUPŠTINE BRČKO DISTRIKTA BiH**

Esed Kadrić